

釋

文

紀

—
—



詳校官中書臣朱文翰

主事銜臣徐以坤覆勘

總校官庶吉士臣何思鈞

校對官編修臣盧遂

謄錄監生臣李承起

欽定四庫全書

釋文紀卷十五

明梅鼎祚輯

宋四

顏延之

字延年琅琊臨沂人
歷金紫光祿大夫

庭誥二章

達見同善通辯異科一曰言道二曰論心三曰校理言

道者本之於天論心者議之於人校理者取之於物從

而別之由塗參陳要而會之終致可一若夫玄神之經
窮明之說義兼三端至無二極但語出梵方故見猜世
學事起殊倫故獲非恒情天之賦道非羗胡華人之稟
靈豈限外內一以此思可無臆裁為道者蓋流出於仙
法故以練形為上崇佛者本在於神教故以治心為先
練形之家必就深廣反飛靈猴丹石粒芝精所以還年
却老延華駐彩欲使體合纁霞軌遍天海此其所長及
偽者為之則忌災崇課粗願混士女亂妖正此其巨蠹

也治心之術必辭親偶開身性師淨覺信緣命所以反
壹無生克成聖業智邀大明志狹恒劫此其所費及詭
者為之則藉翦落狎菁華傍榮聲謀利論此其甚誣物
有不然事無不弊衡石日陳猶患差忒况神道不形固
衆端之所假未能體神而不疑神無者以為靈性密微
可以積理知洪變欽恍可以大順待照若鏡天肅若窺
淵能以理順為人者可與言有神矣若乃罔其真而貴
其弊是未加心照耳

弘明集

鮑照 字明遠東海人 歷中書舍人

佛影頌

形生羸怪神照潭寂驗幽以明考心者迹六塵煩苦五
道綿劇乃炳舟梁爰悟淪溺色丹貌績留相瓊石金光
絕見玉臺遺覲俾昏作朗效順去逆 鮑明遠集

張暢 字少微吳人 會稽太守

若耶山敬法師誄 并序

夫待物而遊致用生外道來自我懷抱以歡故悔寶停

璞導兼車以出魏鸞逆雲緒豈增軒以入衛是以士之
傲俗尚孤其道幽居之民無悶高獨吾每宣書風流照
爛故已跂予感詠身心不足若乃冲獨之韻少歲已高
絕領之氣蚤志能遠初憇駕廬山年始勝髮緬邈之志
直已千里乃求剃形就道忘家入法時沙門釋慧遠雖
高其甚高以其尚幼未之許也遂乃登絕澗守太陽臨
虛投地之險以身易志法師乃竒而納焉曹翔華肩業
集素履勁露未嚴先風苦節同學不勝其勞若人不改

其操於時經臧始東肄業華右遂叩途萬里屢遊函洛定
慧相曉致用日微羅什既亡遠公沈世乃還迹塞門屏
居窮岫其不出若耶之山者於茲二十餘年矣余叔
謝病歸身唯風停想法師乘感來遊積席談宴清言竟
夜不別而別故已默語交達而動靜虛圓矣徵士戴顓
委調宣簡神居共逸風理交融乃倚岫成軒停林啟館
即此人外因心會友西河方浪東山已墮風雲既盡草
木餘哀心之憂矣淚合無開嗚呼哀哉乃為誄曰

在尚上王歌鳳伊洛逸路翔雲高軒鳴鶴靈源世流幽
人代作歸來之子跨古逢運結轍承風遵途襲問緯玉
則溫經金斯振歲學兩幼年盈數始今德既軒其秀唯
起鋒穎萬代風標千里情愛相輕家國如草達矣哲人
獨肆玄寶總駕七覺飛鞍八道三江多靜湛勝廬山地
去萬物軌迹停玄遼遼清慧結宇承煙前驅羣有首路
人天吾生製融集彼清風業流善會情竦妙同白日春
上素月秋中方寸無底六合可窮卓彼羅什三界特秀

真俗冠冕神道領袖若人對響承車即轍沙漠織寒長
風負雪投袂冰霜攬裾暮節誰斯問津悠焉在哲莊矜
老帶孔思周懷百時如一京載獨開甸地既滿願惟糟
魄移此無生棲居樹席妙入環中道出形上所謂伊人
玄途獨亮智虛于情照實其相生住無住異壤相尋羅
什就古慧遠去今匠石何運伯牙罷音殷憂逃遁昔還
爾心東巖解迹削景若耶早帳風首春席雲阿流庭結
草復渚含波月軒東秀日落西華情步不辭寢興高絕

白雲臨操清風練節經綸五道提衡六趣四諦歸想三
乘總路生滅在法諸行難常哲人薪盡舊火移光白日
投晦中春起霜嗚呼哀哉昔余九髮蚤譙清襟送志非
歲迎韻考心家貧親老耕而弗飽就檄追歡身素孤天
既隔于形徒通以道自我徙病高謝東山明月逢靜白
雲路間承松吐嘯風上舒言咨予戴侯夙居深峻佇館
伊人流心酌韻如何高期隔成幽顯五弦喪弄三觴誰
餞嗚呼哀哉山泉同罷松竹哀涼秋朝霜露寒夜嚴長

嗚呼哀哉孤猴將思旅雁聲時廣開性品無情者誰連
 臺成草比館唯悲存亡既代物色長哀嗚呼哀哉蒼生
 失御萬物無歸陰燕就夜重陽頓暉嗚呼哀哉伊四望
 之茫茫愴予心之悄悄雖淚至之有端固憂來其無兆
 隱長思以歎悲諒從橫於言表嗚呼哀哉
廣弘明集
 蕭摹之

裁檢佛事奏

元嘉十二年丹陽尹蕭摹之奏詔
 可又沙汰沙門罷道者數百人

佛化被于中國已歷四代形像塔寺所在千數進可以

擊心退足以招勸而有頃以來情敬浮末不以精誠為
至更以奢競為重舊宇頽弛曾莫之修而各務造新以
相誇尚甲第顯宅於茲殆盡材竹銅綵糜損無極無關
神祇有累人事違中越制宜加裁檢不為之防流遁未
息請自今以後有欲鑄銅像者悉詣臺自聞興造塔寺
精舍皆先詣所在二千石通辭郡依事別言本州須許
報然後就功其有輒鑄銅制造寺舍者皆依不承用詔
書律銅宅林苑悉没入官

宋書

周朗

字義利汝南安
成人廣陵太守

上孝武帝書

自釋氏流教其來有源舒引容潤既亦廣矣而假糴醫
術託以卜數外形不容內教不晦而橫天地之間莫之
糾察今宜伸嚴佛律裨重國令其疵惡顯著者悉宜罷
遣餘則隨其藝行合為之條例使禪義經誦人能其一
食不過蔬衣不出布若更度者則令先習義行本其神
心必能草腐人天諫精已往者雖侯王家子亦不宜拘

意同前矣

廣弘明集

顧歡

字景怡吳郡鹽官人從豫章雷次宗諮玄儒諸義隱遁不仕

夷夏論

南齊書云佛道二家互相非毀歡著夷夏論雖同二法而意黨道教末司徒宏原託

為道人通公駁之歡復答論焉按梁原自有駁所謂通公者慧通也亦自有駁載弘明集齊

書乃云託名通公未詳

夫辨是與非宜據聖典尋二教之源故兩標經句道經

云老子入關之天竺維衛國國王夫人名曰淨妙老子

因其晝寢乘日精入淨妙口中後年四月八日夜半時

剖左腋而生墜地即行七步於是佛道興焉此出玄妙
內篇佛經云釋迦成佛有塵劫之數出法華無量壽或
為國師道士儒林之宗出瑞應本起歡論之曰五帝三
皇不聞有佛國師道士無過老莊儒林之宗孰出周孔
若孔老非聖誰則當之然二經所說如合符契道則佛
也佛則道也其聖則符其跡則反或和光以明近或曜
靈以示遠道濟天下故無方而不入智周萬物故無物
而不為其入不同其為必異各成其性不易其事是以端委

搢紳諸華之容偏袒肩衣羣夷之服擎跽罄折候甸之
恭膜頂禮拜荒流之肅棺殯榔墓中夏之制火焚水沈
西戎之俗全形守禮繼善之教斂貌易性絕惡之學豈
伊同人爰及異物鳥王獸長往往是佛無窮世界聖人
代興或昭五典或布三乘在鳥而鳥鳴在獸而獸吼教
華而華言化夷而夷語耳雖舟車均於致遠而有川陸
之節佛道齊乎達化而有夷夏之別若謂其致既均其
法可換者而車可涉川舟可行陸乎今以中夏之性效

西戎之法既不全同又不全異下育妻孥上廢宗祀嗜
欲之物皆以禮伸孝敬之典獨以法屈悖禮犯順曾莫
之覺弱喪忘歸孰識其舊且理之可貴者道也事之可
賤者俗也捨華效梵義將安取若以道耶道固符合矣
若以俗邪俗則大乖矣屢見刻舷沙門守株道士交諍
小大互相彈射或域道以為兩或混俗以為一是牽異
以為同破同以為異則乖爭之由淆亂之本也尋聖道
雖同而法有左右始乎無終端乎無末泥洹仙化各是

一術佛號正真道稱正一一歸無死真會無生在名則
反在實則合但無生之教賒無死之化切切法可以進
謙弱賒法可以還夸強佛教文而博道教質而精精非
麤人所信博非精人所能佛言華而引道言實而抑抑
則明者獨進引則昧者競前佛經繁而顯道經簡而幽
幽則妙門難見顯則正路易遵此二法之辨也聖匠無
心方圓有體器既殊用教亦異施佛是破惡之方道是
興善之術興善則自然為高破惡則勇猛為貴佛跡光

大宜以化物道蹟密微利用為已優劣之分大畧在茲

夫蹲夷之儀婁羅之辯各出彼俗自相矜解猶蟲喧鳥

聒何足述效

孔老非聖一作孔老非佛

袁粲駁

其畧祭見後

白日停光恒星隱照誕降之應事在老先似非入闕方

炳斯瑞又老莊周孔有可存者依日末光憑釋遺法盜

牛竊善反以成蠹檢究源流終異吾黨之為盜耳西域

之記佛經之說俗以膝行為禮不慕蹲坐為恭道以三

繞為虔不尚踞傲為肅豈專戎土爰亦茲方襄童謁帝
膝行而進趙王見周三環而止今佛法在華乘者常安
戒善行交蹈者恒通文王造周太伯創吳草化戎夷不
因舊俗豈若舟車理無代用佛法垂化或因或革清信
之士容衣不改息心之人服貌必變變本從道不遵彼
俗俗風自殊無患其亂孔老釋迦其人或同觀方設教
其道必異孔老治世為本釋氏出世為宗發軔既殊其
歸亦異符合之唱自由臆說入仙化以變形為上泥洹

以陶神為先變形者白首還緇而未能無死陶神者使
塵惑日損湛然常存泥洹之道無死之地乖詭若此何

謂其同

炳南史
作昭

答袁粲駁

按道經之作者自西周佛經之來始乎東漢年踰八百
代懸數十若謂黃老雖久而濫在釋前是呂尚盜陳恒
之齊劉季竊王莽之漢也經云戎氣強獷乃復畧人頰
車邪又周禮九檮各有威儀原壤夷俟惡其蹲踞故周

公制之於前仲尼戒之於後又舟以濟川車以征陸佛
起於戎豈非戎俗素惡邪道出於華豈非華風本善邪
今周孔既衰莊老亦遠佛來破之良有以矣佛道實貴
故戒業可遵戎俗實賤故言貌可棄今諸華士女氏族
弗草而露首偏踞濫用夷禮云於翦落之徒全是異俗
國有舊風法不可變又若觀風流教其道必異物非東
華之道道非西戎之法魚鳥異淵水不相關安得老釋
二教交行八表今佛既東流道亦西邁故知世有精蘊

教有文質然則道教執本以領末佛教救末以存本請
問所異歸在何許若以翦落為異則胥靡翦落矣若以
立像為異則俗巫立像矣此非所歸歸在常住常住之
象常道孰異神仙有死權便之說神仙是大化之總稱
非窮妙之至名至名無名其有名者二十七品仙變成
真真變成神或謂之聖各有九品品極則入空寂無為
無名若服食茹芝延壽萬億壽盡則死藥極則枯此修
考之士非神仙之流也

並南齊書

謝鎮之

宋明帝時常侍

佛

祖通載作何鎮之誤

與顧道士折夷夏論書

謝鎮之白敬覽夷夏之論辯推一源詳據二典清辭斐
曄宮商有體玄致疊疊其可味乎吾不涯管昧竭闕幽
宗苦不思探蹟無階蒙糴但鏡復逾三未消鄙惑聊述
所疑庶聞後釋論始云佛是老子老子是佛又似仙化
比泥洹長生等無死爰引世訓以符玄教纂其辭例蓋
似均也未譏翦華廢祀亦猶蟲諠鳥聒非所宜效請試

論之案周孔以儒墨為典老莊以棄教明筌此皆開漸
遊方未猶洪祐也且蟲鳥殊類化道本隔夫欲言之宜
先究其由故人參二儀是謂三才三才所統豈分華夏
則知方以類聚物以羣分近而徵之七珍人之所愛故
華夷同貴恭敬人之所厚故九服攸敦是以闕雎之風
行乎四國况大化所陶而不洽三千哉若據經而言盖
間佛之興世也古昔一法萬界同軌釋迦文初修菩薩
時廣化羣生於成佛而有其土預霑慈澤皆來生我國

我閻浮提也但久迷生死隨染俗流鬢失正路未悟前
覺耳以聖人俯三達之智各觀其根知區品不同故說
三乘而接之原夫真道唯一法亦不二今權說有三殊
引而同歸故遊會說法悟者如沙塵拯沈濟惑無出此
法是以當來過去無邊世界共斯一揆則知九十有五
非其流也明矣彼乃始言其同而未言其異故知始之
所同者非同未之所異者非異將非謬擊瓦釜濫諧黃
鍾邪豈不誣哉至如全形守祀戴冕垂紳披氎繞貝理

塵焚火正始之音婁羅之韻此俗禮之小異耳今見在
鳥而鳥鳴在獸而獸响允執萬之一音感異類而殊應
便使夷夏隔化一何混哉舟枯車溺可以譬彼夫俗禮
者出乎忠信之薄非道之淳修淳道者務在反俗俗既
可反道則可淳反俗之難故宜祛其甚泰祛其甚泰必
先墮冠削髮方衣去食墮冠無世飾之費削髮則無筭
櫛之煩方衣則不假工於裁製去食則絕情想於嗜味
此則為道者日損豈梵俗之所致及其敷文一籍三歲

四含此則為學者日益豈華風之能造又云佛經繁顯
道經簡幽推此而言是則幽者鑽仰難希顯則涉求易
望簡必不足以示理繁則趣會而多津佛法以有形為
空幻故忘身以濟衆道法以吾我為真實故服食以養
生且生而可養則及日可與千松比霜朝菌可與萬椿
齊雪邪必不可也若深體三界為長夜之宅有生為大
夢之主則思覺寤之道何貴於形骸假使形之可練生
而不死此則老宗本異非佛理所同何以言之夫神之

寓形猶於逆旅苟趣舍有宜何戀戀於檐宇哉夫有知之知可形之形非聖之體雖復堯孔子生壽不盈百大聖泥洹同於知命是以永劫已來澄練神明神明既澄照絕有無名超四等此則正真終始不易之道也又刻船者祈心於金質守株者期情於羽化故封有而行六度凝滯而茹靈芝有封雖奉六度之體為之或能濟物凝滯必不羽化即事何足兼人尋二源稍迹曠局異懷居然優劣如斯之流非可具詰彼我自我之近情非通

方知宏識則知殊俗可以道甄哀哉玄聖既邈斐然競
興可謂指蟲迹為蒼文餌螿乳為醞醐良可哀也佛道
汪洋智量不可以言窮應迹難以形測其辯有也則萬
相森陳若干峙竝立其析無也則泰山空盡與秋毫俱
散運十力以摧魔弘四等以濟俗抗般若之法炬何幽
而不燭潛三昧之法威何遠而不服寧疑夷夏不效哉

重與顧道士書

并亂佛祖通載云嶽卷其書固自封執鎮之重與之書

謝鎮之白猥辱反釋究詳淵況既和光道佛而涇渭釋

李觸類長之爰至綦奕敷佛彌過精旨踰昧夫飾櫃貿
珍曜夜不售所謂馳走滅迹跳動息影焉可免乎循雅
論所據正以道釋異門夷夏舛俗余以三才均統人理
是一俗訓小殊法教大同足下答云存乎周易非胡書
所擬便謂素旗已舉不復伸檢玄旌為素魔異乎曹子
之觀旗輒復畧諸近要以標大歸然髻珠雖隱暮四易
顯卯以寄譖儻不貽忤夫太極剖判兩儀忘構五陰合
興形識謬彰識以流染因結形以愛滯緣生羲皇之前

民多專愚專愚則巢居穴處飲血茹毛君臣父子自相
視秦越猶若禽獸又比蒙童道教所不入仁義所未移
及其妣慾淪波觸崖思濟思濟則祈善祈善則聖應夫
聖者何邪感物而遂通者也夫通不自通感不自感感
恒在此通每自彼自彼而言懸鏡高堂自此而言萬象
斯歸故知天竺者居娑婆之正域處淳善之嘉會故能
感通於至聖土中于三千聖應既彼聲被則此觀日月
之明何假離朱之察間雷霆之音奚事子野之聽故卑

高殊物不嫌同道左右兩儀無害天均無害天均則雲行
法教不嫌同道則雨施夷夏夫道者一也形者二也道者
真也形者俗也真既猶一俗亦猶二盡二得一宜一其法
滅俗歸真必反其俗是以如來制軌玄劫同風假令孔老
是佛則為韜光潛導守匡教偏心立仁樹義將順近情是
以全形守祀恩接六親攝生養性自我外物乃為盡美
不為盡善蓋是有涯之制未鞭其後也何得擬道菩提
比聖年尼佛教敷明要而能博要而能博則精疎兩汲

精疏兩汲則剛柔一致是以清津幽暢誠規易準夫以規為
圓者易以守為圓者難將不舍其所難從其所易邪道家
經籍簡陋多生穿鑿至如靈寶妙真採撮法華制用尤拙
及如上清黃庭所尚服食咀石餐霞非徒法不可効道亦
難同其中可長唯在五千之道全無為用全無為用未
能遣有遣有為懷靈芝何養佛家三乘所引九流均接
九流均接則動靜斯得禪通之理是三中之一耳非其
極也禪經微妙境相精深以此締真尚不能至今云道

在無為得一而已無為得一是一則玄契千載玄契千載
不俟高唱夫明宗引會導達風流者若當廢學精思不
亦怠哉豈道教之益邪敬尋所辨非徒止不解佛亦不

解道也反亂一首聊酬啓齒

卷一作全

亂曰運往兮韜明玄聖兮幽翳長夜兮悠悠衆星兮暫
暫太暉灼兮昇曜列宿奄兮消蔽天輪掬兮殊材歸敷
繩兮一制苟專迷兮不悟增上驚兮遠逝卞和慟兮荆
側豈偏尤兮楚厲良芻蕘兮般若焉相責兮智慧

亂一本作

頌

朱昭之

常侍

難顧道士夷夏論書

并難

見足下高談夷夏辨商二教條勒經旨冥然玄會妙唱
善同非虛言也昔應吉甫齊孔老於前吾賢又均李釋
於後萬世之殊塗同歸於一朝歷代之疑爭怡然於今
日賞深悟遠蠲慰者多益世之談莫過於此至於各言
所好便復肝膽楚越不知苦甘之方雖二而成體之性

必一乃互相攻擊異端遂起往反紛類斯害不少惜矣
初若登天光被俗表末如入淵明夷輝淪夫導師失路
則迷途者衆故忘其淺昧遽相牽拯令先布其懷未陳
所恨想從善如流者不惜乖於一往耳山川悠遠良話
未期聊寄於斯以代暫對情旗一接所釋不淺朱昭之

白

夫聖道虛寂故能圓應無方以其無方之應故應無不
適所以自聖而檢心本無名於萬會物自會而為稱則

名號以為之彰是以智無不周者則謂之為正覺通無
不順者則謂之為聖人開物成務無不達也則謂之為
道然則聖不過覺覺不出道居可知也何須遠求哉但
華夷殊俗情好不同聖動常因故設教或異然曲禮淨
戒數同三百威儀容止又等三千所可為異政在道佛
之名形服之間耳達者尚復以形骸為逆旅袞冕豈足
論哉所可為嫌抵在設教之始華夷異用當今之俗而
更兼治遷流變革一條宜辨耳今當言之聖人之訓動

必因順東國貴華則為袞冕之服禮樂之容屈伸俯仰
之節衣冠簪佩之飾以弘其道蓋引而近之也夷俗重
素故教以極質髡落徽容衣裳弗裁閉晴開照期神曠
劫以長其心推而遠之也道法則採芝餌英餐霞服丹
呼吸太一吐故納新大則靈飛羽化小則輕強無疾以
存其身即而效之也三者皆應之一用非吾所謂至也
夫道之極者非華非素不即不殊無近無遠誰舍誰居
不偏不黨勿毀勿譽圓通寂寞假字曰無妙境如此何

所異哉但自皇羲以來各弘其方師師相傳不相關涉
良由彼此兩足無復我外之求故自漢代以來淳風轉
澆仁義漸廢大道之科莫傳五經之學彌寡大義既乖
微言又絕衆妙之門莫遊中庸之義弗覩禮術既壞雅
樂又崩風俗寢頽君臣無章正教凌遲人倫失序於是
聖道彌綸天運遠被玄化東流以慈係世仁衆生民黷
所先習欣所新聞草而從和精義復興故微言之室在
在竝建玄詠之賓處處而有此可以事見非真布之空

談將無物不可以終否故受之以同人故邪意者夫聖人之撫百姓亦猶慈母之育嬰兒始食則餌以甘肥甘肥既厭復改以脂蜜脂蜜既厭則五體休和內外平豫為益至矣不其然乎理既然矣而橫厝非貶妄相分別是未寤環中不可與議二賢推盪往反解材之勢縱復得解非順理之作順理析之豈待推盪足下發源開端明孔老是佛結章就議則與奪相懸何措紳擎跽為諸華之容稽首仰足則有失儀之貶端委罄折為侯甸之

恭右膝著地增異俗之辱請問若孔是正覺釋為邪見
今日之談吾不容聞許為正真何理鄙謂既虧畏聖之
箴又忘無苟之禮取之吾心所恨一也又云全形守禮
繼善之教毀貌易性絕惡之學是商臣之子有繼善之
功覆障毀落有絕惡之志推尋名實為恨二也又云下
棄妻孥上廢宗祀夫鬼神之理冥漠難明故子路有問
宣尼弗釋當由生死道殊神緣難測豈為聖不能言良
恐賢不能得三違之鑒照之有在足下已許神化東流

而復以喪祭相乘與奪無定為恨三也又云切法可以
進謙弱賒法可以退夸強三復此談顛倒不類夫謙弱
易回可以賒和而進夸強難化應以苦切乃退隱心檢
事不其然乎批糠在目則東西易位偏著分心則辭義
舛惑所言乖當為恨四也又云抑則明者獨進引則昧
者競前夫道言真實敬同高唱覆載萬物養育衆形而
云明者獨進似若自私佛音一震則四等兼羅三乘同
順天龍俱靡而云昧者競前亦又近誣探蹟之談而妄

生瘡疣游辭放發為恨五也又云佛是破惡之方道是
興善之術破惡之方吾無間然夫惡止善行乃法教所
以興也但未知興善之術術將誰然若善者已善奚用
興善善者非善又非興善則興善之名義無所託今道
者善也復以興善取之名義太為繼富不以振惡為教
褊矣大道兼弘而欲局之為恨六也又云殘忍剛愎則
師佛為長慈柔虛受則服道為至夫摧伏勇猛迴靡殘
暴實是年尼之巨勳不乖於慧旨但道力剛明化功彌遠

成性存存恩無不被梟鳩草心威無不制而云唯得虛
受太為淺畧將無意淪偏著不悟狹劣傷道邪披尋第
目則先誠臆說建言肆論則不覺情遷分石難持為恨
七也又云八象西戎諸典廣畧兼陳金剛般若文不踰
千四句所弘道周萬法麤妙兩施繁約共有典法細誠
科禮等碎精麤橫生言乖乎實為恨八也又云以國而
觀則夷虐夏溫請問炮烙之苦豈康竺之刑流血之悲
詐齊晉之子列別之苦害非左社之心秋露含垢匪海

濱之士推檢性情華夷一揆虛設溫嚴為恨九也又云
博奕賢於慢遊講誦勝於戲謔尋夫風流所以得傳經
籍所以不廢良由講誦以得通諮求以成悟故曰學而
不講是吾憂也而方之戲謔太為慢德請問善誘之筌
其將安寄初未得意而欲忘言為恨十也有此十恨不
能自釋相望君子更為深之謝生亦有參差足下攷之
已密且專所請不復代匠

朱廣之

字處深吳郡錢塘人臨川
王常侍善清言見南史

諮顧道士夷夏論書

并難

朱廣之叩頭見與謝常侍往復夷夏之論辯章同歸之
義可謂簡見通微清練之談也至於聃尚端冕之飾屏
破翦落之素巾以擊踧之恭辱以蹲踞之肅桎束華人
杜絕外法舟車之喻雖美平恕之情未篤致會之源既
坦筌寄之塗方壘然則三乘之悟窅望茲土六度之津
於今長訣披經翫理悵快良深謝生貶沒先道褒明佛
教以羽化之術為浮濫之說殘形之唱為履真之文徒

知己指之為指不知彼指之無殊豈所以通方得意善
同之謂乎僕夙漸法化晚味道風常以崇空貴無宗趣
一也蹄網雙張義無偏取各隨曉入唯心所安耳何必
龍袞可襲而瓔珞難乘者哉自貧來多務斫斲沈潛緘
卷巾牘奄逾十載幼習前文零落頓盡蘊志空年開瞻
靡階每獨慵慨遙夜輒啟旦忘寐而清心遠信纏苦彌篤
若夫信不泐理則輕汎無主轉墮之賓因斯而起是以
罄率狂管書述鄙心願重為啟誨敷導厥疑廣之叩頭

論云擊跪罄折侯甸之恭也膜頂禮拜荒流之肅也疑
曰夫邦殊用隔久自難均至於各得所安由來莫辨侯
甸之容所言當矣狐狗之目將不獨傷

論云若謂其致既均其法可換者而車可涉川舟可行
陸乎必不可也疑曰夫法者所以法情情非法也法既
無定由情不一不一之情所向殊塗剛柔竝馳華戎必
同是以長川浩漫無當於此矣平原遠陸豈取於彼邪
舟車兩乘何用不可

論云既不全同又不全異下棄妻孥上廢宗祀疑曰若夫廢祀於上不能絕棄於下此自擬異人同非同者之過也寧可見犁牛不登宗廟之用而永棄於牢餼之具邪

論云嗜欲之物皆以禮伸孝敬之典獨以法屈悖德犯順曾莫之覺疑曰若悖德犯順無施而可慈敬惠和觸地而通是以損善行道非徵凶之宅服冕素餐非養正之方屈伸之望可相絕於此矣

論云理之可貴者道也事之可賤者俗也今捨華效夷
義將安取若以其道邪道固符合矣若以其俗邪俗則
天乖矣疑曰至道虛通故不爵而尊俗無不滯故不黜
而賤賤者不能無累尊者自然天足天足之境既符俗
累之域亦等道符累等又誰美誰惡故俱是聖化唯照
所惑惑盡明生則彼我自忘何煩遲遲於捨效之際耿
介於華夷之間乎

論云無生之教賒無死之化切切法可以進謙弱賒法

可以逞夸強疑曰無生即無死無死即無生名反實合
容得賒切之別邪若以跡有差降故優劣相懸者則宜
以切抑強以賒引弱故孔子曰求也退故進之由也兼
人故退之致教之方不其然乎

論云佛教文而博道教質而精精非麤人所信博非精
人所能疑曰夫博聞強識必緣照逾廣敦修善行必因
理入微照明則理無不精理精則明無不盡然則精博
同功相為利用博猶精也豈麤人所能信精猶博也豈

弘通所獨闕

論云佛言華而引道言實而析析則明者獨進引則昧者競前疑曰夫華不隔理則為達鑒所陶實未屆虛故為鑽賞所業陶業有序者為質昧邪為待明邪若其質昧則明不獨進若必待明則昧不獲前若明昧俱得何須抑引妙况難章所宜更辯

論云佛經繁而顯道經簡而幽幽則妙門難見顯則正路易遵遵正則歸塗不迷見妙則百慮咸得疑曰簡則

易從云何難見繁則難理豈得易遵遵正則歸塗不迷
可以階道之極雖非幽簡自然玄造何假難明之術代
茲易曉之路哉

論云若殘忍剛愎則師佛為長慈柔虛受則服道為至
疑曰夫邪見枉道法所不存慈悲喜捨是所漸錄喜心
則能受捨亦必虛虛受之義窅然復會未知殘愎之人
更依何法若謂所受者異則翻成刻船何相符之有乎
論云佛是破惡之方道是興善之術又以中夏之性不

可倣西戎之法疑曰興善之談美矣勿倣之誨意所未
安請問中夏之性與西戎之人為夏性純善戎人根惡
如今根惡則於理何破使其純善則於義何興故知有
惡可破未離於善有善可興未免於惡然則善惡參流
深淺互列故羅雲慈惠非假東光桀跖凶虐豈鍾西氣
何獨高華之風鄙戎之法邪若以此善異乎彼善彼惡
殊乎此惡則善惡本乖寧得同致

論云蹲夷之儀婁羅之辯猶蟲喧鳥聒何足述倣疑曰夫

禮以伸敬樂以感和雖敬由禮伸而禮非敬也和因樂感
樂非和也故上安民順則玉帛停筐風淳俗泰則鐘鼓輟
響又鍾帛之運不與二儀並位蓋以拯頓權時不得已而
行耳然則道義所存無係形容苟造其反不嫌殊周全祇
蹲虔跪孰曰非敬敬以伸心孰曰非禮禮敬玄符如何徒
捨含識之類人標其所貴貴不在言言存貴理是以麟鳳
懷仁見重靈篇猩猩能語受蚩禮章未知之所論義將何
取若執言捐理則非知者所據若仗理忘言則彼以破

相明宗故李叟之常非名欲所及維摩靜默非巧辨所
追檢其言也彼我俱遣尋其旨也老釋無際俱遣則濡
沫可遺無際則不負高貴何乃遠望般若名非智慧便
相挫躓比類蟲鳥研復逾日未愜鄙懷且方俗殊韻豈
專胡夏近唯中邦齊魯不同權輿倣落亦古今代述以
其無妨指錄故傳授世習若其非也則此未為是如其
是也則彼不獨非既未能相是則均於相非想茲漢音
流入彼國復受蟲諠之尤烏聒之誚婁羅之辨亦可知

矣一以此明廷楹可齊兩若兼除不其通乎夫義奧淵
微非所以宜參誠欲審方玄匠脚伸一往耳傾心遙貯
遲聞後裁

釋慧通駁顧道士夷夏論

通姓劉沛人住治
城寺多著義疏

余端夏有隙亡事忽景披顧生之論昭如發蒙見辨異
同之原明是非之趣辭豐義顯文華精奧每研讀忘倦
慰若萱草真所謂洪筆君子有懷之作也然則察其指
歸疑笑良多譬猶盲子採珠懷赤菽而反以為獲寶聲

賓聽樂聞驢鳴而悅用為知音斯蓋吾子夷夏之談以
為得理其乖甚焉見論引道經益有昧如昔老氏著述
文指五千其餘淆雜竝淫謬之說也而別稱道經從何
而出既非老氏所創寧為真典庶更三思儻祛其惑

論云孔老非佛誰則當之道則佛也佛則道也以斯言
之殆迷厥津故經云摩訶迦葉彼稱老子光靜童子彼
名仲尼則知老氏非佛其亦明矣實猶吾子見理未弘
故有所固執然則老氏仲尼佛之所遣且宣德示物禍

福而後佛教流焉然夫大道難遵小成易習自往古而致歎非來今之所慨矣老氏著文五千而穿鑿者衆或迷妖妄以迴人心或專淫虐以振物性故為善者寡染惡者多矣僕謂搢紳之飾罄折之恭殞葬之禮斯蓋大道廢之時也仁義所以生孝敬所以出矣智欲方起情偽日滋聖人因禁之以禮教制之以法度故禮者忠信之薄取亂之首也既失無為而尚有為寧足加哉夫剪髮之容狐蹲之敬永沉之俗僕謂華色之不足吝貨財

之不可守亦已信矣老氏謂五色所以令人目盲多歲
必之後失故廼剪髮玄服捐財去世讓之至也是以秦
伯無德孔父嘉焉斯其類矣夫膜拜始自天竺而四方
從之天竺天地之中佛教所出者也斯乃大法之整肅
至教之齊嚴吾子比之狐蹲厥理奚徵故夫凶鬼助惡
強魔毀正子之謂矣譬猶持瓢以滅江海側掌以蔽日
月不能損江海之泉掩日月之明也至夫太古之初物
性猶淳無假禮教而能緝正弗施刑罰而自治死則葬

之中野不封不樹喪至無期哀至便哭斯乃上古之淳
風良足效焉子欲非之其義何取又道佛二教喻之舟
車夫有識聞之莫不莞爾而笑僕謂天道弗言聖人無
心是以道由人弘非道弘人然則聖人神鑒靡所不通
智照寧有不周而云指其專一不能兼濟譬猶靈暉朝
靚稱物納照時風夕灑程形賦音故形殊則音異物異
則照殊日不為異物而殊照風不為殊形而異音可知
其日一也其風一也稟之者不同耳吾子以為舟車之

喻義將焉允然夫大教無私至德弗偏化物共旨導人
俱致在戎狄以均響處胡漢而同音聖人寧復分地殊
教隔寓異風豈有夷邪寧有夏邪昔公明儀為牛彈清
角之操伏食如故非牛不聞不合其耳也轉為蝻蝻狐
犢之聲於是奮耳掉尾蹠蹠而聽之今吾之所聞者盖
蝻蝻之音也夷夏之別斯旨何在又云下棄妻孥上廢
宗祀嗜欲之物皆以禮伸孝敬之典獨以法屈夫道俗
有晦明之殊內外有語默之別至于宗廟享祀禘祫皇

考然則孝敬之至世莫加焉若乃煙香夕臺韻法晨宮
禮拜懺悔祈請無輟上逮歷劫親屬下至一切蒼生若
斯孝慈之弘大非愚瞽之所測也夫國資民為本君恃
民而立國之所以寧民之力也推如來談似為空設又
云刻船桑門守株道士空爭大小互相彈射彼撫華論
深釋久滯尋文求義於何允歸夫外道淫奔彌齡積紀
沈悔弗遷淪惑寧反遊涉墟鄉泛越鄠落公因聖術私
行淫亂得道如之何斯可恥昔齊人好獵家貧犬鹿窮

年馳騁不獲一獸於是退而歸耕今吾子有知歸耕得
算又云大道既隱小成互起辯納相傾孰與正之夫正
道難毀邪理易進譬若輕羽在高遇風則飛細石在谷
逢流則轉唯泰山不為飄風所動磐石不為疾流所迴
是以梅李見霜而落葉松柏歲寒之不凋信矣夫姪妖
之術觸正便挫子為大道誰為小成想更論之然後取
辯若夫顏回見東野之馭測其將敗子貢觀邾魯之風
審其必亡子何無知若斯之甚故標愚智之別撰賢鄙

之殊聊舉一隅示予望能三反又云泥洹仙化各是一
術佛號正真道稱正一一歸無死真會無生無生之教
賒無死之教切斯蓋吾子聰辯能言鄙夫後以如之然
則泥洹滅度之說著乎正典仙化入道之唱理將安附
老子云生生之厚必之死地入云天地所以長久者以
其不自生也夫忘生者生存存生者必死子死道將屈
故謂之切其殊切乎諺曰指南為北自謂不惑指西為
東自謂不蒙子以必死為將生其何反如之故潛居斷

糧以修仙術僕聞老氏有五味之戒而無絕穀之訓矣
是以蟬蛾不食君子誰重蛙蟒穴歲聖人何貴且自古
聖賢莫不歸終吾子獨云不死何斯濫乎故舜有蒼梧
之墳禹有會稽之陵周公有改葬之篇仲尼有兩楹之
夢曾參有啟足之辭顏回有不幸之歎子不聞乎豈謬
也哉昔者有人未見麒麟問常見者曰麟何類乎答曰
麟如麟也問者曰若常見麟則不問也而云麟如麟何
邪答曰麟麇身牛尾鹿蹄馬背問者乃曉然而悟今吾

子欲見麟邪將不見告又云道經簡而幽幽則妙門難
見僕謂老教指乎五千過斯已外非復真籍而道文重
顯愈深疑怪多是虛託妍辭空稱麗句譬周人懷鼠以
質璞鄭子觀之而且進斯之謂矣尋此而言將何克允
又云殘忍剛愎則師佛為長慈柔虛受則服道為至矣
故老子云強梁者不得其死吾將以為學文故人所以
敷行誠籍顯著文教將為愚瞽之故非為賢哲之施矣
違之者必凶順之者必吉夫強梁剛愎之人下愚之類

也大教慈愍方便為之將非虛邪學文邪慈柔虛受僕
謂宜空談今學道反之陳黃書以為真曲佩紫錄以為
妙術士女無分閨門混亂或服食以祈年長或媵姣以
為瘳疾慈柔之論於焉何託以道迹密而微利用在已
故老子云吾所以有大患者為吾有身也及吾無身吾
又有何患老氏以身為大患吾子以軀為長保何其乖
之多也夫後身而身先外身而身存惟云在已未知此
談以何為辯又云婁羅之辯各出彼俗自相領解猶蟲

誼烏聒何足述效僕謂餌辛者不知辛之為辛而無羨
於甜香悅臭者不覺臭之為臭而弗耽椒蘭猶吾子淪
好淫偽寧有想於大法夫聖教妙通至道淵博既不得
謂之為有亦不得謂之為無無彼我之義竝異同之說
矣夫言猶射也若筈之離弦非悔恨所及子將慎言乎
而云蟲誼烏聒意則何依近者孫子猖狂顯行無道妖
媼喪禮殘逆廢義賢士守志而已愚夫輒為迴心姦儔
盈室惡侶填門墟邑有痛切之悲路陌有羅苦之怨夫

天道損盈鬼神福謙然後自招淪喪

釋僧愍戎華論折衷夏論

建業寺僧愍見梁昭明解二諦義

昔維摩者內乘高路功亮事外龍隱人間志揚淵海神
灑十方理正天下故乃跡臨西土協同幽唱若語其靈
變也則能令乾坤倒覆促延任意若語其真照也則忘
慮而幽凝言絕者也如此之人可謂居士未見君稱居
士之意也君今七慢之岳未摧五欲之谷未填慧陽之
日未曜無明之雲未晴永冥之風未息夜遊之迷未旋

君既解猶常品而山號居士乎貧道遙餐器量知君未
堪斯據然此雖大法之淺號而亦未易可當矣省君夷
夏論意亦具照來心貧道踐學天壇希囑茲况而此所
論者才無玩文之麗識無鑒幽之效照無寸光澤無露
潤萬塗斯闕有何義哉而復內秉茫思獲申閣說輕弄
筆墨仰卜聖旨或混道佛合同或論深淺為異或說神
邦優劣或毀清正賓實夫苦孛繁子而枝折藥大謬唱
而受臬此皆是上世之成制後賢之遠匠矣今將示君

道佛之名義異也夫佛者是正靈之別號道者是百路
之都名老子者是一方之哲佛據萬神之宗道則以仙
為貴佛用漏盡為妍仙道有千歲之壽漏盡有無窮之
靈無窮之靈故妙絕杳然千歲之壽故乘龍御雲
乘龍者生死之道也杳然之靈者常樂永淨也若斯者
故能璇璣竝應跡臨王城宮踈遶闕細委重軒故放彼
萬國誓越三空龍飛華館整駕道場於是初則唱於鹿
苑次則集於天宮中則播於靈鷲後則扇於熙連故乃

巨光遐照白日寢輝華軒四蓋梵駕天垂九天齊歌羣
仙悟機凡預有緣莫不雲集會歸馬唯有周皇邊霸道心
未興是以如來使普賢威行西路三賢並導東都故經
云大士迦葉者老子其人也故以說教五千翼匠周世
化緣既盡迴歸天竺故有背關西引之邀華人因之作
化胡經也致令寡見之衆詠其華焉君未詳幽旨輒唱
老佛一人乎聞大聖現儒林之宗便使周孔莊老斯皆
是佛若然者君亦可即老子邪便當五道羣品無非是

佛斯則是何言歟真謂夸父逐日必渴死者也君言夷
夏論者東有驪濟之類西有羌戎之流北有匈奴鮮卑
南有閩駱甌越姬孔施禮於中故有夷夏之別戎華者
東盡於堙境西則窮于幽鄉北則弔于溟表南則極乎
牢閭如來扇化中土故有戎華之異也君責以中夏之
性效西戎之法者子出自井坂之淵未見江湖之望矣
如經曰佛據天地之中而清導十方故知天竺之土是
中國也周孔有雅正之制如來有超俗之憲雅正制故

有異於四夷趨俗憲故不同於周孔制四夷故八方推
德憲加周孔故老子還西老子還西故生其羣戎四夷
推德故踰增其迷夫正禮巨易真法莫移正禮巨易故
秦伯則於吳越而整服真法莫移故佛教則東流而無
改緣整服故今裸壤翫裳法無改故使漢賢偏袒翫裳
故使形逼中夏偏袒故使仰齊西風形逼中夏故使山
巖而空慢遠齊西風故使近見者莫不信也若謂聖執
無定應隨方異者秦伯亦可裸步江東君今亦可未服

裳也故雖復方類不同聖法莫異君言義將安取者謂
取正道也於是道指洞玄為正佛以空空為宗老以太
虛為奧佛以即事而淵老以自然而化佛以緣合而生
道以符章為妙佛以講導為精太虛為奧故有中無無
矣即事而淵故觸物斯奧矣自然而化故霄堂莫登矣
緣合而生故尊位可升矣符章為妙故道無靈神矣講
導為精故研尋聖心矣有中無無故道則非大也觸物
斯奧故聖路遐曠也霄堂莫登故云云徒勞也尊位可

升故智士亡身也道無靈神故傾顏何求也研尋聖心
故沙門雲興也爾乃故知道經則少而淺佛經則廣而
深道經則尠而穢佛經則弘而清道經則濁而漏佛經
則素而貞道經則近而闇佛經則遠而明君染服改素
實參高風也首冠黃巾者卑鄙之相也皮草苦頂者莫
非華風也販符賣錄者天下邪俗也博頰扣齒者倒惑
之至也反縛伏地者地獄之貌也符章合氣者姦狡之
窮也斯則明闇已顯真偽已彰君可整率匹侶徇涉清

衡貧道雅德內顧同奉聖真豈有惡乎想必不逆允於

往示耳

李焱

與高明二法師難佛不見形書

道高
法明

夫道處清虛四大理常而有法門妙出羣域若稱其巧
能利物度脫無量為教何以不見真形於世真空說而
無實邪今正就尋西方根源伏願大和上垂懷允納下
心無惜神誥弟子李焱和南

釋道高答李交州書

釋道高白奉垂問至聖顯晦之迹理味淵博辭義照洗
敬覽反覆彌高德音使君垣墻崇邃得門自難輒罄愚
管罔象玄珠夫如來應物凡有三焉一者見身放光動
地二者正法如佛在世三者像教髣髴儀軌髣髴儀軌
應今人情人情感像孰為見哉故淨名經云善解法相
知衆生根至於翺頭末城龍華三會人情感見孰為隱
哉故法華經云時我及衆僧俱出靈鷲山儂佉之宮儂

然可期西方根源何為不覩而世之疑者多謂經語不
符閻寄情少成以不覩生滯夫三皇五帝三代五霸姬
旦孔丘刪詩制禮竝聞史籍孰覩之哉釋氏震法鼓於
鹿園夫子揚德音於鄰魯皆耳目所不得具信之於書
契若不信彼不患疑此既能了彼何獨滯此使君聖思
淵遠洞鑒三世願尋壽量未盡之教近取定光儒童之
迹中推大通智勝之集以釋衆人之幽滯若披重霄於
太陽貧道言淺辭拙語不宣心冀奉見之日當申之於

論難耳謹白

重與道高法師書

李焱和南旋省雅論位序區別辭沉冲美欣會良多所謂感化異時像正殊俗援外以映內徵文以驗實敬範來趣無所間然然夫受悟之由必因鑒觀闇寄生疑疑非悟本若書契所存異代齊解萬世之後可不待聖而師矣若乃聲迹並資言象相濟大義既乖儒墨競興豈徒正信不朗將亦謗誤增釁得不取證於示見印記以

自固乎大聖以無礙之慧垂不請之慈何為恪昭昭之
明晦倍尋之器絕羣望於泥洹之後興罪垢於三會之
先芻狗空陳其能悟乎儀像虛設其能信乎至於帝王
姬孔訓止當世來生之事存而不論故其隱見廢興權
實莫辨今如來軌業彌貫三世慈悲普潤不得以見在
為限羣迷求解不可以滅盡致窮是以化度不止於篇
籍佛事備列於累萬問今之所謂佛事者其焉在乎若
如雅況所信在此所驗在彼而聖不世出孔釋異塗即

事而談罔非矛盾矣其可相驗乎未能默廢聊復寓言
幸更詳究遲覩清釋

道高重答李交州書

釋道高白重奉深誨義華旨遠三讀九思方服淵致故
知至理非庸近能測微言奧辭非鄙訥所參今謹率常
淺麤陳所懷夫萬善為教其途不一有禪宴林藪有修
德城傍或曲躬彈指或歌讚頌詠皆耳眼所共了為者
亦無量斯則受悟之津由閤寄之稱何必受悟因於鑒

觀何必闔寄慮其生疑疑亦悟本請當論之疑則求解
解則能悟悟則入道非本如何雖儒墨之競興九流之
是非乃燭火之不息非日月之不暉何急急於示見而
促促於同歸哉今不同季俗無證驗以徵誠亦不謬大
聖裕昭昭之光明而世之疑者据以不覩形遂長迷於
大夢橫沈淪而溺生死先儒往哲靡有舊答既途無異
輒輒述而不作夫亡身投誠必感則俱見不感不見其
有見者以告不見其不見者會不信見聖人何嘗不在

羣生何嘗不見哉聞法音而稱善芻狗非謂空陳覩形
像而曲躬靈儀豈為虛設姬孔救頽俗而不贍何暇示
物以將來若丘旦生遇於結繩則明三世而不已問今
佛事其焉在乎低首合掌莫非佛事但今深悟有方殊
途同歸耳前疏所引彼此疑信者正為世人不見便謂
無佛故取不見周孔為其繩準耳此乃垂拱而相隨豈
矛盾之謂哉使君生知無假素氣天然居大寶之地運
穎脫之思流浪義苑涉步書園吐握餘暇優游永日德

音既宣莫不側聽貧道學業麤淺彌慙簡札上酬謬略
懼塵盛藻追增悚愧流汗霏霖謹白

又與高法師書

李淼和南雅論明受悟之津爰自疑得闡寄有餘無取
鑒觀鞠躬讚誦咸足屆道覽復往况彌覩淵曠然所謂
像法乖正求悟理麤借筌會旨無假示見此固姬孔所
以垂訓輝光所以不表取之世典綽焉足矣放光動地
徒何為乎若正信不止於俯仰而佛事備舉於形聲大

覺所由妙其色涉求之所基始故知信者必以儒墨致
疑學者將由無證自悔吝明無咎於三五潛景道德愆
於十號矣豈不然乎又所謂姬孔務拯頽季無暇來生
設在結繩三世自明亦又不然七經所陳義兼未來釋
典敷載事止緣報故易云積善餘慶積惡餘殃經云無
我無造無受者善惡之業亦不亡此則緣教常緩兼訓
已弘豈謂所務在此所闕在彼哉來論雖美故自循環
之說耳望復擢新演異以洗古今之滯使夷路坦然積

礙大通也深願大和上垂納亮款弟子李淼謹呈

釋法明答李交州書

釋法明白巨論爰降敬覽移日馥若幽蘭清若惠風貧
道器非霜頴運非庖生動乖理間獨躡疑駭良由辭訥
旨滯劇難星陳愚謂貳暗寄竒鑒觀示見鞠躬歌讚感
動靈變並趣道之津梁清升之嘉會故宜寄觀雙舉疑
驗兩行豈得罷絕示見頓漏神彩齊軌姬孔同範世訓
放光動地徒為空言夫法身凝絕妙色湛然故能隱顯

順時行藏莫測顯則乘如而來隱則善逝而去即言求
旨何愆於十號哉餘暉所映足光季俗信者豈以螢燭
增疑正向旦日白黑比肩塏像經書彌滿世界學者豈
以無證自悔又引七經義兼未來積善餘慶積惡餘殃
雖新新生滅交臂代謝善惡之業不得不受此乃過明
三世愈亮七經徵翰檢實則聞命矣前論云帝王姬孔
訓止當世來生之事存而不論故其隱見廢興權實莫
辨似若矛盾義將安寄當仁不讓伏聽淵牘前疏粗述

至聖沈浮而義据末照詞況未泯謹更詳究共弘至道
夫羣生長寢於三有衆識永惛於六塵潛移為吞噬之
主相續為迴轉之輪形充逆旅之館神當過憩之賓往
來三惡而苦楚經離八難而酸辛欣樂暫娛憂畏永勤
一身死壞復受一身雖世智辨聰羣書滿腹百家洞了
九流必達知死生有命富貴在天鬼神莫之要聖哲弗
能預未免謬見以翳情疑似以干慮寄懷於巫瞽投誠
於符呪執邪以望正存偽以待真遲迴於兩心躊躇於

二遙放光動地其可見乎所以玄籍流布剝筌待機機
動必感感而後應者也自有棲志玄宅下操幽淵明一
生若朝露辨三世之弗虛縱轡於清真之術斂控於濁
偽之衢植德耘邪而薈蔚樹福灌正而扶疏苦節競辰
於寸陰潔已爭逝於桑榆懷誠抱向感而遂通豈不親
映光彩而覩其靈變哉若耳眼所不自了或通夢之所
見如漢明因夢以感聖大法於是而來遊帝主傾誠以
歸德英豪斂衽以服化沙門齊肩於王公僧尼直躬於

天子九十六種孰為高哉宋武皇帝始登帝位夢一道人提鉢就乞因而言曰君於前世施維衛佛一鉢之飯今居斯位遣問嚴公徵其虛實嚴公即送七佛經呈聞吳主孫權初疑佛法有靈驗當停罷省遂獲舍利光明照宮金鐵不能碎爐冶不能融今見帝京建初寺是吳郡有石佛浮身海水道士巫師人從百數符章鼓舞一不能動黑衣五六朱張數四薄爾奉接遂相勝舉即今見在吳郡北寺惇誠至到者莫不有感朱張連世奉佛

由覩驗致郭文舉祇崇三寶正信堅明手探虎鯁深識
安危蘭公拂嚴雪於猛獸護公感枯泉而洪流竝高行
逸羣清身邁俗皆有異迹世咸記焉自茲以外不可勝
論貧道少惰學業迄于白首孤陋寡聞彰于已誠直言
朴辭未必可採懼不允當伏追慙悚謹白

竝弘明集

素祭

字景倩陳郡陽夏人歷尚書令

與僧道明書

寶亮師青州道明法師至京居中興寺祭與道明書自是學名稍盛疏澗

樂經梁武

序見後

頗見亮公非常人也比日聞所未聞不覺歲之將暮珠

生合浦魏人取以照車壁在邯鄲秦王請以華國天下

之寶當與天下共之非復上人貴州所宜專也

照車通載作照

乘米云天下之寶不可自專當與同之也

費文淵

上刺史張悅書

釋道汪姓潘長樂人住蜀武擔寺成都徵士費文淵從受業汪將赴

梁州刺史申坦淵上書悅即歎焉

道汪法師識行清白風霜彌峻卓爾不羣確焉難拔近

聞梁州遣迎承教旨許去闔境之論僉曰非宜鄆州邊
荒僧尼出萬禪戒所資一馬是賴豈可水失其珠山忘
其玉願鑒道俗之誠今四輩有憑也

張辨

吳人平南長史

釋曇鑒讚

鑒姓趙冀人律行精苦終江陵辛寺辨為傳讚

披荔逞芬握瑾表潔渾渾法師弗緇弗涅焯焯初辰條
蔚暮節神遊智往豈伊實訣

雙桐沙門讚

僧瑜餘杭人孝建二年焚身旬後房中生雙桐連理辨為傳讚

悠悠玄機茫茫至道出生入死孰為妙寶其自昔藥王

殊化絕倫往聞其說今覩斯人其英英沙門慧定心固

凝神紫氣表迹雙樹其其德可樂其操可貴文之作矣

式颺髣髴其

王玄載

釋普恒贊

恒成都人昇明三年終蜀安樂寺州將王玄載為之贊

大覺眇無像懸應貴忘靖一念會道場空過萬劫永信

心虛東想遇聖藻西影妙趣澄三界傳神四禪境俗物

故參差真性理恒炳韜光寄浮世遺德方化迥茲高僧傳

陸澄

字彥淵吳人齊國子祭酒

法論目錄序

宋明帝勅中書侍郎陸澄撰十六帙有目無文

第一論或列篇立第兼明衆義者今總其宗致不復槩

分合之則體全別之則文亂置難形神援譬薪火庚闡

發其義謝瞻廣其意然桓譚未及聞經先著此言有足

奇者宜其綴附也

牟子不入教門而入緣序以特載漢明之時像法初傳

故也

魏祖答孔是知英人開尊道之情習生貽安則見令主

弘信法之心所以有取二書指存兩事又支遁敷翰遠

國述江南僧業故兼錄

出三歲
記雜錄



釋文紀卷十五